

Maleruagassat atuuttut aqqutigalugit aalisarnerup aqutsivigineqarnerata allannor-tinneratigit Upernaviup aqutsiveqarfiani qaleralittassiissutit tamakkerlugit aalisarne-qarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneernejarnera

Naalakkersuisut Inatsisartut Aalisarnermut, Piniarnermut Nunalerinermullu Ataatsimiititaliaat isumaliutissiissutaat pillugu matumuuna qutsavigaat. Naalakkersuisut maluginiarpaat ataatsimiititap siunnersuutip akuersissutigineqarnissaa inassutigigaat. Naalakkersuisut kaammattorneqarput siunnersuutip aappassaaneernejarnerani apeqqutit akeqqullugit, taakkunanga apeqqutit siullermeernejarnerani apeqqutigineqarput:

- 1) Naalakkersuisut sinerissap qanittuani pisassiissutit appartinneqarnissaannik sulilpersaaruteqarpat?

Naalakkersuisut ulloq 29. november 2018 aalajangiippat aqutsiveqarfimmi Qeqertarsuup Tunuani Upernavimmilu qaleralinnik pisassiissutit ukiut sisamat ingerlaneranni TAC-mut, pisarineqarsinnaasut annertussusissaattut akuerineqartunut, biologit siunnersuutaannut naleqqutsikkiartuaarneqassasut. Naalakkersuisut tamanna aalajangiusimavaat.

- 2) Taamaattoqassappat, sinerissap qanittuani pisassiissutit qaqugu appartinneqarnissaat Naalakkersuisut ilimagaat?

Naalakkersuisut apeqqummut siullermut akissuteqaatiminnut innersuussippat. 2020-imut pisassiissutissat Naalakkersuisut ukiup naanissaani aalajangersassavaat naatsorsuutigineqarlu-nilu decembarimi 2019 tamanna pissasoq.

- 3) Sinerissap qanittuani qaleralinnik pisassiissutit appartinneqarpata, Naalakkersuisut qanoq taamaaliulersaarpat?

Naalakkersuisut taaneqartutut novembaarip 29-anni 2018-imi aalajangernerminni pisassiissutit ukiut sisamat ingerlaneranni ukiumut 10%-imik pisassaasussanit ilanngaatisassavaat.

- 4) Naalakkersuisut sumiiffiit pisassiivigineqanngitsut atorunnaarsinnaanerannut atatillugu qaleralinnik pisassiissutit qaffannissaat ilimagaat?

Naalackersuisut sumiiffiit pisassiivigineqanngitsut ataatsimut isigalugu allanngortinnissaannik isumaliutersuuteqarput allannguinnissamillu aalajangiinnnginnermi Aalisarneq pillugu Ataatsimiititaliarsuup suliaa utaqqillugu.

- 5) Naalackersuisut pisasseeriaaseq atorunnaarsilersaarpaat, taamaaliortoqarniarpallu suna anguniarneqarpa?

Naalackersuisut pisasseeriaaseq atorunnaarsinniarlugu eqqarsaateqanngillat.

- 6) Polar Seafood A/S-ip Upernavimmi saattussanik qalerinnillu pisiortornissamut tunisassiorfimmik aallartitsinissaata qaqugu akuerineqarnissaa Naalackersuisut ilimagaat?

Naalackersuisut Polar Seafood A/S-ip qinnuteqaataa maajip 23-anni 2019 suliaaraat, suliffeqarfillu nalunaarfigalugu Upernavimmi saattuanut qaleralinnullu tunisassiorfiliornissamut akuerineqartoq.

- 7) Suliffeqarfik akuerineqanngippat akuersissuteqarnissamut inatsisitigut suna akornutaanersoq ataatsimiititaliap paasissallugu kissaatigaa? Inatsisit tamassumunnga akornutaappata tamassuma qanoq aaqqinneqarnissaaneraniq nassuiaanissamik Naalackersuisut qinnuivigineqarput.

Naalackersuisut apeqqummut 6-imut akissuteqaatiminnut innersuussippat.

- 8) Imm. 175-ip oqaluuserineqarnerani Kangersuatsiami pisiortornermi pissutsit ilaatigut immikkut piunasaqaatit pissutigalugit ajornakusoortut arlaleriarluni oqaatigineqarput. Pissutsit taakku qaqugu paasinarsissappat?

Naalackersuisut illuatungeriit namminersortut iliuusaat taakkulu akornanni isumaqatigiissutigineqartut sunniuteqarfigisinnaanngilaat.

Naalackersuisut maluginiarpaat ataatsimiititap siunnersuummik suliaqarnerminnut atatillugu Naalackersuisut sulinissaminni ilanngullugit kaammattuuteqarfigigaat tassani qulakkeeqqullugu qaleralittassiissutit tamakkerlugit pisinissaannut periarfissanik aqutsiveqarfinni Ummannami aamma Qeqertarsuup Tunuani suliniuteqassasut. Taassuma saniatigut umiarsuarnik tunitsiviliinissamut aporfinnik qaangeeriaataasussanik misissuissasut. Ilanngullugu kissaatigineqarluni tunisassiorfiliorniarnermi unammillersinnaannginnermut periutsit peerneqarnissaanik misissuineq aamma nunaqarfinni tunitsivitsigut periarfissat misissorneqassasut.